

編號 1 號

【路燈著咧】林伯殷原作

臨暗邊，天還已亮，屋脣个路燈就著咧，係無看較真兜，頭下碼<sup>1</sup>還正經毋知路燈著咧，一直愛等到天轉暗，路燈个火正會緊來緊光，正確確實實知自家屋脣个路燈著咧！在暗晡時頭，這支路燈摺佢屋脣个大路箭到<sup>2</sup>光光，摺出出入入个人、車仔照到清清楚楚，逐日食飽夜以後，鄰舍會企在路燈下打嘴鼓，共下等垃圾車來；熱天時，屋肚較熱，路燈下自然就變成乘涼、散步个場所，等到冷天時，路燈又變成一蕊光明燈，像人摺佢講，看著佢，燒暖个屋下就到咧！

臨天光，路燈就起勢慢慢行下戲棚，天越光，路燈火就越看毋著，最尾，連幾時烏忒个也無人知，路燈非常知進退，完全毋會去摺日頭搶光<sup>3</sup>，在日時頭，路燈就在該恬恬等，等夜來个時節做得好好發揮一下。

等到斷烏咧，路燈準時來上棚！摺負責个所在照到光光亮亮，到久咧，人嗰分路燈縱壞，毋記得佢逐夜就恁認分、恁煞

猛，一直愛到有一夜，發現本旦該光个地方還暗暗，正會知路燈原來有恁好惜。想起佢个老屋，暗晡時屋脣滿遍暗摸叮咚<sup>4</sup>，係無擎火，根本就行無路，毋使想出半步門，毋過，就算有擎手電筒行路，該細電珠仔<sup>5</sup>發出弱弱个光係照得路來，會驚頭那頂有蜷蜷網無看著，係照得頭那頂來，又驚蛇哥隨時會對路脣弄出來<sup>6</sup>，毋管自家仰般細心細意，心肝肚還係會驚驚險險<sup>7</sup>，仰當得<sup>8</sup>這下个路燈火，分人恁安心、恁自在！

一支路燈，照光个地方盡有限，毋過，路燈係一支一支連起來，該就做得照亮一隻莊頭、一條街路、一座都市。路燈毋單淨照亮一隻地方，也減少忒日摺夜个爭差<sup>9</sup>，改變人个生活。都市肚个公園，暗晡頭還有人打氣功、跳舞摺運動，大路町也還有人行路摺騎自行車，係無路燈，敢有可能？

暗咧！路燈又著咧！佢知路燈會摺當多暗暗个地方照到光光，分人方便上下、分人做得安心，佢也知有當多人摺路燈共樣，恬恬在該照亮佢个社會。

<sup>1</sup> 頭下碼：音 teu ha<sup>+</sup> ma<sup>-</sup>；剛開始的時候。

<sup>2</sup> 箭到：音 zien<sup>-</sup> do<sup>-</sup>；被光照到。

<sup>3</sup> 搶光：音 ciong<sup>-</sup> gong<sup>-</sup>；爭著出風頭。

<sup>4</sup> 暗摸叮咚：音 am<sup>-</sup> mo<sup>-</sup> din dung；天色或環境暗得看不見的樣子，形容一片漆黑。

<sup>5</sup> 電珠仔：音 tien<sup>+</sup> zhu<sup>-</sup> er；燈泡。

<sup>6</sup> 弄出來：音 nung<sup>-</sup> chud loi；鑽出來。

<sup>7</sup> 驚驚險險：音 giang<sup>-</sup> giang<sup>-</sup> hiam<sup>+</sup> hiam<sup>+</sup>；感到驚險可怕的樣子。

<sup>8</sup> 仰當得：音 ngiong<sup>-</sup> dong<sup>-</sup> ded；怎麼比得過。

<sup>9</sup> 爭差：音：zang<sup>-</sup> ca<sup>-</sup>；差別。

編號 2 號

【學泅水】徐姿華原作

佢一溜來斯當驚水，小學一年生該下，先生鼓勵大家學泅水，講泅水係當好个運動。佢身邊个好同學做下曉泅水咧，逞強个佢毋願輸人，轉去屋下緊嚟<sup>1</sup>阿姆講愛去學泅水。趕避暑，阿姆攞佢尋著一間溫水个游泳池，還請著名聲盡好个教練來教佢，又買一身靚靚个連身泅水衫分佢著，鼓勵佢勇敢學泅水。

第一擺去到游泳池，又驚又好。做好體操，教練渡佢攞另外四個學生仔練習沒水、學換氣；教練攞佢兜一個一個拗落游泳池，佢兜乖乖聽教練指示，攞頭那沒落水竇肚，佢嚇到盡命拈巴等游泳池砌脣、腳趄趄毋敢沾著水、嘶骸另命、噉到鼻涕流串<sup>2</sup>，像分人苦毒到當恠樣；脣頭个人做下緊看佢緊笑，教練緊拐佢，佢還係噉到失聲、毋肯落水竇肚去，高不將斯請阿姆攞佢渡轉去。

該暗晡，阿爸好聲好氣鼓勵佢續等去學泅水；阿姆斯唉唉唧唧道嘆：「若係毋去上課，學費無好退，錢斯會白白了忒去。」

阿哥也分享自家學泅水个經驗，還拿出佢當愛惜个極樂仔，講愛做佢學會泅水个獎品。在大家个鼓勵之下，佢答應第二日愛再過去上游泳課咧。

第二日朝晨，阿姆愛載佢去上游泳課，追了追佢還係生拉拉、死拉拉<sup>3</sup>、拖拖擲擲毋肯停動。上課時間強強會赴毋著咧，阿姆關到拿起雞毛掃<sup>4</sup>愛修理佢，佢試著當委屈，又驚阿姆打，又驚愛下水泅水，斯噉到馬咬樣，歸條巷仔都聽到清清楚楚。鄰舍過來關心，知佢係驚泅水正噉到大嬲聲，做下忍等笑鼓勵佢。斯恁樣，該站時間，朝晨頭巷頭巷尾若係聽著佢又噉到哇哇滾，斯知該日佢又愛去上游泳課咧。

經過三隻禮拜个練習，游泳課个同學一批一批學會走忒咧，同學換了換，佢還係手攞腳配合毋著，手記得划水咧，腳又毋記得踢水，實在無結煞。有一日，佢自家練習，毋多知手攞腳噉配合得著咧，泅有五公尺恁遠，心肝肚實在還歡喜那！佢續等練習，緊來緊熟手，手腳也緊來緊省力，軀身也緊來緊輕鬆，第一擺感受著泅水个趣味。

感謝該量時，屋下人支持也鼓勵驚水个佢面對自家个困難去學泅水，分佢有機會去克服自家軟弱个所在，這下个佢，毋單淨曉得泅水也做得堅強去迎接人生个各種挑戰。

<sup>1</sup> 嚟：音 kiau；言語糾纏。

<sup>2</sup> 鼻涕流串：音 pi<sup>+</sup> lau pi<sup>+</sup> chon<sup>~</sup>；鼻涕在口鼻間上下流竄。

<sup>3</sup> 生拉拉死拉拉：音 sang<sup>~</sup> lai<sup>~</sup> lai<sup>~</sup> si<sup>~</sup> lai<sup>~</sup> lai<sup>~</sup>；死活不肯就範。

<sup>4</sup> 雞毛掃：音 gai<sup>~</sup> mo<sup>~</sup> so<sup>~</sup>；雞毛撻子。